

春
在
堂
詩
編

乙丙編

春在堂詩編十一

德清俞樾

福祿壽祇

舊臘於吳下得斷祇有福祿壽三字乙酉元旦賦此
試筆

昔得福壽祇右台山之麓今又得此祇福壽益以祿借
問所從來初非意所屬吳下有荒墟偶此事畚揭土中
露殘甃有文人共囑奴子頗好事不辭手親刷剔薛視
其文三字尙可讀攜歸獻主人吉語頗不俗歲朝無一
事手揭紙數幅名山福壽編得此儻可續

余於壬午年曾作小詩布告同人
有停止作文三載之約
至今秋滿矣
雖宿痾小減而精力仍衰
敢援舊例再展三年
卽用前韵又賦一律

荏苒光陰忽已輝
殫唐精力復殊難
古方服食無雲母
新朔頒行又日官
卻憶舊時三載約
已於今歲九秋完
仍申前約如前數
十度春秋儻過韓
再展三年則余年
六十八矣韓昌黎
壽止五十
七故云然

彭雪琴尙書寄示虎門軍營除夕述懷詩次韵答之

海外眞成大漏卮
狂言欲發自嫌癡
要窮鼃軸三千界

別練龍韜十萬師能使戈船周異域不愁烽火似今時
待君長劍摩天日先折欃槍第一枝余前數日曾以磬
圖罪言一篇奉寄
故次句云然通篇
亦卽罪言之意也

舟過唐西觀梅於超山飯於報福寺留題香雪樓

鄧尉尋春未有緣日前擬探梅
鄧尉未果偶來此地一流連山中

初茁貓頭筍湖上輕搖燕尾船是日賃小舟泛於丁
山湖其船名燕尾佛

石尙留唐代墨寺有石刻吳道
子畫觀音像仙梅猶逞宋時妍寺前
有古

梅數林云
宋物也何當更躡超山頂海色江聲在榻前余孫兒
陸雲登

超山之巔望錢唐江及龜赭兩
山了了在目余以風大不果登

贈日本僧無適

始信天涯若比鄰但論文字總相親
謬承請業蕭夫子幸識能詩休上人
何肉周妻平等法無適仍娶妻食肉在彼國謂之眞宗
郊寒島瘦苦吟身昔年枉結珊瑚網
海外猶餘未採珍

余前年選日本詩有方外詩四卷

嚴少藍夫人所畫墨龍歌

昔有巧工來自鸞霄國畫龍不點龍
雙睛龍睛一點即飛去滿堂風雨來
縱橫世人但傳僧繇事豈知語本拾
遺記大凡神物總通神禹廟梅梁何
足異後來最著四明僧五代時以畫
龍稱回翔升降皆有勢直欲前無曹
不興畫龍亦復有工拙口吻翕張見
優劣開口之猶合

口龍能使畫師肱三折不櫛進士雄於詩

夫人自稱餘不櫛進士

事作繪尤神奇偶然貌此鱗蟲長濡染大筆何淋漓古

人畫馬卽師馬不知畫龍何師也得無奇氣在胸中自

有真龍來腕下阿兄攜圖示我索我歌

夫人之兄爲愧縉生庶常

我少年頭角都銷磨但願臨摩百本或千本長爲海國

鎮壓蛟龍鼉

詠日本國櫻花

余觀東瀛詩人之詩無不盛稱其國櫻花之美讀而慕焉求之未得今年井上子德以小者四株寄贈賦詩紀之

不是櫻桃也號櫻傳來異卉自東瀛白加婆喜通奇語

在東國有赤加婆白加婆之名黃栗留慙竊美名屈曲連根盤老幹續

紛弄影綴繁英花開卻好春三月一入中華奉夏正彼開

國人言四月月開花乃清明前即開花始訝其早繼乃悟中東之朔本有一月之差也

瓊譜芝圖總未標東邦久已入風謡靜姬應讓三分潔

紫史還輸百種嬌靜姬紫史皆東國美女彼中詩人曾以喻此花也墨水文波

相掩映東國水名卯花素質助妖嬈亦彼國花名楊妃久住蓬萊

島今日歸從海外遙有名楊妃櫻者

曾向山僧乞一枝昔年曾屬東國心泉和尚覓之春風消息竟遲遲遙

知花國分移日也似明妃遠嫁時珍重封題煩驛使商

量澆灌護仙姿到來喜值初開候不負鸞輪海上馳

李杜韓蘇見未嘗

東國詩人廣瀨吉甫櫻花詩云李杜韓蘇誰識而

我今得見

試評量千金聲價逾蒿芑一笑風神敵海棠自可靚妝

爭玉女未容驕語壓花王

東國人每云中土有此花牡丹不得爲花王矣斯言也余

未敢

從今補入羣芳譜添得東風幾日忙

花農在都門於除夕買梅花一株其花已盛開至

二月下旬花猶無恙乃採數朶賦詩寄贈及至吳

中則三月初矣色香未變亦可異也余因採櫻花

數朶報之而媵以詩卽用原韵

五雲絢爛一箋開

來書用自製五雲箋

知有新詩日下來豈止相

思慰蕭艾並教生色到蒿萊東華道上傳春信西子湖

邊憶舊栽

君於俞樓栽紅梅一株十月而開彭雪琴尙書爲繪圖紀之

驛使居然破

成例翻從燕市寄蘇臺

老夫衰病鬢添霜喜有名花鬪艷妝妻壘移來雖國色

帝城分到是花香已煩助我林泉興亦擬增君翰墨光

寄去白加婆數朶越裳白雉預呈祥

白加婆見前詩注

乾隆閒日本曾以金幣聘吾邑沈南屏先生爲畫

師今余又應其國人之請選定日本詩四十四卷

沈肖巖廣文以爲皆吾邑盛事賦詩見贈率成一

絕句酬之

昔賢畫筆重扶餘浪竊詩名笑我虛邠使東瀛傳盛事

清溪三絕畫詩書

年來日本求書者幾於無月無之合之或可稱三絕乎

孫兒陞雲應科試以第一名入縣學口占誌喜

五十年來舊夢存

余於道光丙申入學今五十年矣

書生門戶又傳孫

舟窗燈火兒依母

時二兒婦同行

場屋文章弟偕昆

姪孫同慳亦入學第

三十已奪錦標前一載

陞雲於去年四月應府試取第一因學使更易故至今四月

始行

未符佳話小三元

俗以縣府院試皆第一者為小三元陞雲府院試皆第一縣試

則第

老夫更有無窮興挈汝秋風到省垣

送潘伯寅尙書還朝

籬鷁雲鵬本不侔兩年翰墨頗綢繆案頭古佛香分炷

君以峨嵋
銅佛見贈

架上新書字代讐

余刻茶香室叢
鈔君為校字

劍履俄聞

趨玉陞姓名會見真金甌只憐衰病曲園叟一別何時再共游

虎邱新築擁翠山莊為詩以張之

昔有僧醢醢曾於橫山麓叩石出清泉旱潦不盈縮

見吳

郡圖經
續記

云何愁愁泉又在虎邱足亦云異僧蹟圖經不

並錄愁與醢音同地亦近相屬得無二而一彼流此則

泐自從軍興來蘇臺屢走鹿休閒醢醢泉愁泉知者孰

坐令名蹟荒未免吾儕惡朱君雅好事

謂朱脩
庭觀察

欲使靈

源復幽討偕山僧諮訪到樵牧秦皇所試劍真孃所埋

玉果有一勺泉清流細如縠洪彭諸君子

洪文卿閣學彭南屏太守

聞而喜相告鄭子感舊夢

鄭小坡孝廉

意更若有觸於焉掃

荆榛於焉興土木於焉命斧斤於焉具畚揭爲屋十數

楹閱月未五六有軒曰抱甕汲此珠一斛有亭曰問泉

應聲出空谷精舍曰靈瀾蕭然絕塵俗旁屋曰來青山

翠疑可掬既成眾來觀僉曰美哉屋可以玩素月可以

迎朝旭可以招輕颺可以避炎熇肇錫以嘉名大書滿

一幅曰擁翠山莊某年月日築楊子爲之記

謂楊景山太守秀

語奪山綠林子爲之圖

林游如名滿昌

天然謝彫琢曲園爲此

詩請與畫同讀

琴西同年以七十自壽詩六章索和每章皆以人生七十古來稀句冠首余意在翻用杜句故到用原韻聊發千里之喙

誰攜尺素叩柴扉一紙新詩萬斛璣且喜山翁仍健飯莫因時事發長啼青雲舊友書都斷黃卷初心事未違從此百年安我拙休言七十古來稀

見說年來戰勝肥天然集韻又翔機不勞故吏投門刺且與兒童拾澗菲舊學有源仍不竭好詩無翼自能飛知君別有千秋在莫道人生七十稀

魂夢猶然傍紫微乞身歸去爲知幾厭看海外魚龍

戲怕受山中猿鶴譏已爲故鄉傳學派更欣令子繼清
輝壺中甲子無須問莫道人生七十稀

領略晨煙又夕霏山中清福不須祈雨窗有弟聯牀聽
宦海何人轉棹歸陶洗閒情仍翰墨拋殘舊物到牙緋
歸然海內靈光殿莫道人生七十稀

詩筆兼長劉孝威老猶清妙見天機不知晚歲臥雲壑
可許故人分釣磯鷗鷺舊曾盟白水鹿麋同不羨金韉
願教共享林泉樂莫道人生七十稀

琴星零落十三徽難認延英舊綠衣異日青山誰誌墓
昔年紫陌共停驂試於老大看誰健莫向生平感昨非

言一
一樣優游閒歲月休言七十古來稀

磨刀雨歌

五月十三日俗傳爲關帝生日有雨爲磨刀雨吳縣
顧鐵卿清嘉錄云主人口平安今年是日有雨戲作
一詩

我讀關公傳初不言用刀但云力可萬人敵不知五兵
何所操及讀魯肅傳刀字始一見諸將軍俱單刀會人
佩一刀而非戰乃觀陶氏刀劍錄公有二刀鑄於蜀採
鐵都山百鍊成銘曰萬人文可讀我疑此亦佩刀耳與
世所傳了不屬荆門州南關廟前眞有大刀如所傳其

刀今插石竅內刀如與石相鉤連千人拔之不可動一

人搖之能回旋刀重一百八十斤桿長丈餘八寸圓見

包汝梅南中紀聞順德有刀更可異上刻青龍偃月字襄樊閒

猶公所經五嶺以南馬跡未曾至何況青龍偃月名此

說荒唐本衍義同是俗傳亦有別彼或可信此則偽順德

事見國朝羅天尺五山志林更取公傳觀從頭試於字義深研求傳

云策馬刺顏良刺之為言猶云以戈搯其喉古者刺兵

乃矛屬見考工記注得毋關張所用皆長矛古事流傳無可

考商女稗官隨意造至今婦豎識關刀武林更有九刀

廟凡闕廟皆有刀杭州一廟獨有九刀周將軍所持一從者八人各持一遂名九刀廟余謂此與魯肅傳諸

將軍俱單刀會頗有合也年年五月十三日爲公生辰誰所述是日

必有雨滂沱云是磨刀水流湍鳴呼懸弧今日不可知

磨刀俗說尤堪嗤南方多雨則爲磨刀日北方多旱則

爲曬甲期

宣化府於是日爲曬甲會蓋神廟有甲出而曬之也

小窗坐聽雨霽霽

惟神威稜孰敢狎願借神力挽天河淨洗人閒兵與甲

彭雪琴親家以陞雲入學和余誌喜原韵三章從

廣東大營寄示疊韵酬之

一紙書來深意存敬將詩句示童孫君期黃榜新科第

來詩之意深以科第助陞雲

我憶青山舊第昆憂

國自然常耿耿

休兵聊且慰元元試歸退省庵中看翠篠紅蕖正繞垣

李憲之廉訪以所著仿潛齋詩集見示卽次其集

中觴字韵一首贈之

小集問詩始濫觴集中第一卷已如初日照扶桑採風

遠至南華洞君曾典廣西試桂林府西湖行部親臨東

呂鄉君曾官充沂曹濟道東呂鄉在忽向胥臺來秉臬

遂教聲叟得登堂投詩并告兼旬別正擬芒鞋踏道場

時余擬暫還湖州道場湖州山名

次韵答李黼堂方伯同年

芋禪小築近俞樓君於俞樓後山築精舍曰芋禪幾度清談共茗甌別

後頓驚同調少書來兼有好詩投且爲昭代存青史

君所撰國朝莫念前情感白頭君比年頻有三復佳

章聊一和西湖譜作榜人謳

跳山訪古歌爲陶心雲作

吾浙從來少漢蹟不圖迭出道光咸豐閒道光癸未始
得跳山之石刻咸豐壬子又有三老遺記出於客星山
建武建初相距既非遠會稽餘姚地更相接如鸛鸕古
墨流傳不可滅遂令述庵司寇生慙顏我昔屢至浙東
地惜乎游覽之福平生慙陶子心雲篤好古跳山萬丈
窮躋攀二十二字盡軒豁明人臆說真堪訕妄謂武肅
跳此幸而免得毋其下錢字偶未藏榛菅因而附會錢

王事徒堪調語欺。鄺闌不知其下更有五行行四字建

初年號烏容刪

明人止見其上大吉二字傳爲錢武肅

吉二字蓋不知其下猶有五行每行四字且有建初元年字也其下又有三萬錢字張少薇太守云豈當時有見錢字者

而傳會邪

昭代崇古古乃出一字真可當千緩三老

古拙此奇恣坐看晉唐名蹟皆羸孱安得摸拓百本或千本庶不負君一日搜尋艱

許氏長外孫女自山左歸感而有作

記得當初送汝時自知再面已無期不圖遠道歸來日翻是衰翁得見之浮世光陰真荏苒空山墳樹已參差今朝看汝低鬟拜觸我殘年無限思

七月七日爲魁星生日見施可齋閩襍記因祀之
而記以詩

文昌司桂籍語始於宋時袁桷清容集曾載其青詞斗
魁戴文昌天官書有之因文昌及魁祀之良亦宜或謂
宜祀奎我又竊獻疑奎星爲毒螫武庫其所司試問縫
掖徒祀奎義何居不如仍其舊實亦無可訾宋代有軼
事流傳自淳熙魁星始臨蜀又向吳中移及乎臚唱曰
試卷帝親披甲乙忽互易甲蜀乙吳兒始歎太史言占
驗不我欺可知魁星重自宋非今茲獨怪其爲狀醜乃
如蒙俱得毋肖字形宜爲亭林嗤然而天星像往往多

怪奇二十八宿形朝暮殊妍媸歲星爲老人熒惑爲兒
嬉安必魁星容白晢鬢須眉慎勿笑忤留猶勝拜鍾馗
惟是天垂象非有生辰垂乃讀閩禠記不知傳自誰云
七月七日是其懸弧期牛女方良會湯餅應見遺此俗
本龍巖江浙無人知文昌有生日秋祀兼官私卽援文
昌例可爲魁星推禮固以義起事皆由人爲敬以乞巧
日再拜陳一卮不徒壽以酒又且張以詩光芒萬丈中
如見鬚鬢姿

食熊蹯作

熊蹯膈難熟宜酒復宜醯

太平聖惠方云酒醋水同煮大如皮韃

聞之程

侍郎又云宜用鷄沃以潯鷄湯醺脫成柔黃與鷄同鼎

膳不久爛如泥凡物蟄土者畏聞雄雞啼熊亦是蟄物

大小理則齊程春海侍郎遺集有熊蹯詩其說如此昔我游溫麻維舟甌

江隄故人方子春惜我三日稽熊蹯食已盡所存惟詩

題往年如福甯道出溫州方子穎觀察方於三日前食熊掌示我以熊蹯詩今年夏潯暑疏

食安鹽齏乃承朱公叔謂修庭觀察一絨來小奚賚我二巨

擘毛氎色則黧子路居深山不儕鹿與麕如何出熊館

一朝入罟罟遂令鼓刀人四鬍存其蹄老夫食指動洗

釜及甌甌付之庖人手刮摩宜金鑊或羹之爲臠或醢

之爲醢我非晉夷皋不熟無訶詆俄而登於盤試我雙

留犁果然齒可決柔輭如牛膾老饕旣屬饕子婦相提
攜分甘到賓客染指及嬖妃舉家嘗異味勝劈尖團臍
熊魚雖並美有熊可無鯁春初食鱗魚來自海舶齋大
嚼竟不可自愧齒無覲今春雪琴尙書及門下上日本
余不能不如此一齏可佐酒一婢轉惜退省翁未付鸞
食也刀卦前在雪琴尙書退省庵作詩記口福細字盈欄

余旣作魁星生日詩并命詰經精舍諸生同作之
或問魁星生日何以必於七月七日無以應也戲
作一詩答之

藝文類聚無中秋而已載有七月七漢武皇帝是日生

不聞更有人同日今爲魁星作生辰此事何從稽故實
嘗讀王遠蠡海集諸神生辰各有說然則魁星義何居
以理推求辭轉窒或者北斗有七星而魁於斗居第一
故卽以七爲月數一七得七魁星出又聞魁爲陽爲明
此理曾聞孟康述七爲少陽九老陽老陽一變失其質
魁生以七不以九義取少陽陽始苗至若明莫明於火
熒熒炎炎孰與匹地二生火七成之以數取之義亦密
無怪舉世仰魁光萬丈輝煌觀者怵宋制州試以仲秋
自宋至今用一律先期一月祀魁星禮亦宜之非有失
我爲魁星一再歌定有光芒照蓬華

贈瞿子玖學使鴻機

昔秉中州節今乘浙水輶詞曹頻出使弱冠早登朝

爲學能知本多才自不驕儀徵文達後未見此風標阮

達年三十五歲浙江學政報滿君今年亦三十五新任浙江學政君其阮文達之替人乎

殷勤承下問嚅囁轉難陳精舍二三子同游十八春徒

勞批尾筆未見出頭人許鄭淵源在從公一間津

九月之望浙闈揭曉余孫陞雲中式第二名賦詩

誌喜

甫於泮水聽鸞聲又向秋風賦鹿鳴

自入學至此適五閱月

先

德敢期常食報衰門頗望早成名魏科已忝唐鄉貢稚

齒剛符漢賈生陸雲年為念天南人盼切捷書飛達老

彭鏗時由電報飛達

老夫昔向月宮游不作人間第二流余於道光甲辰歲

弟二名後有疵其三藝者遂抑置三十六余賦詩云不

傍人休憫惜雖集內詩曾邀父笑榜頭名竟為孫留羣

公競擊閨中節場後瞿子玖學使見陸雲文決其必售

為陸雲也即與副考官潘嶧琴宮允良友先凝日下眸

言之逮發彌封果然相與擊節歎賞

次日即得徐花農太史由來歲杏花消息裏可能平步

電致賀并招人到瀛洲

口本人岸吟香年逾五十始舉丈夫子乞名於余

余以五十日艾因名之曰艾生并贈以詩

半百初聽雛鳳鳴此兒合以艾爲名請看二十餘年後
爭向東瀛訪艾生

嘉平十九日爲第二曾孫女珉寶洗三適親家翁
彭雪琴尙書自粵還蘇薄治湯餅賓朋小集時雨
雪未霽李憲之方伯用東坡聚星堂詩韵見贈次
韵答之

我一青氊傳累葉家世舊聞述螢雪童孫秋賦倖成名
先代書香欣未絕頗望桑弧當戶懸不辭屐齒過門折
如何雌霓又連蜺卻喜檜櫓久銷滅元老新從海外歸

酒籌復向尊前掣是時玉戲猶未收看取冰花已如纈
門前佳客來青蓮坐上名言飛玉屑但得賓朋聚有緣
不愁歲月去如瞥險韵同賡坡仙詩禁體仍用歐公說
只憐頭白老尙書鬢已如銀心尙鐵

丙戌二月四日余親送孫兒陸雲航海入都應禮
部試二兒婦及孫女從焉蓋自送縣府試至今相
沿成故事矣賦此紀行

溯從童試至鄉闈母子翁孫不暫違幸得聯翩偕計吏
又教牽率到皇畿三年三度好春色
前年送縣試以正月往去年送
學院試以三月往六十六翁大布衣婦豎提攜人八口同

隨候雁 鳳城飛

至上海附海晏輪船北行所居曰官艙中爲大艙
者一左右爲小艙者各三一門之內若一家然亦
可喜也題四絕句

海天如鏡淨無埃最好晴窗六扇開若做西湖湖舫例
此舟題作大浮梅

飛艫原不異行庵艤旣終宵睡思酣待問如何安睡法
老夫臂似坐搖籃

迢遞雲山接北溟蠻煙蜚雨海風腥金經一卷清晨誦
可有魚龍檻外聽

依然一室話喁喁浮海乘桴婦豎從我嬾支頤無一事

靜聽四十八回鍾

輪船中擊鍾報時與自鳴鍾異一時四擊自一至八周而復始故一日凡

四十八次擊鍾云

到天津賦贈門下士朱伯華觀察

著錄門生數百人惟君曾共歷艱辛

往歲曾與同避粵寇之亂相依兩載

蘇臺魂夢廿年別

丙寅歲別於蘇州

柏府頭銜二品新

君已加按察使

銜并賞

官職會須功業副交情已見死生真

君避亂時感內

子姚夫人調護之恩事之如母亡兒紹萊歿於津門君經理其後事甚至

丁沽此日重相遇

老淚龍鍾欲滿巾

入都寓居潘家河沿

舊遊回首總雲煙遙望長安遠在天老我懶尋驢磨跡
嬌孫喜賦鹿鳴篇因攜骨肉人三兩重問舟車路幾千
租得潘家河畔屋孤松一樹暫流連

牆外有松
樹一株

次日賦五言一章題客坐之右

自出春明門二十有三年

甲子歲入都
遣嫁第二女

吾衰久矣夫只

合山中眠豈復有意興來賦都京篇惟念膝下孫稚小
素所憐遠赴春官試未免心懸懸老夫爲牽率自忘旅
力愆其母亦偕行其姊遂從焉溯自童試來若有成例
沿燕臺好春色多士來聯翩乃於前一月賃得屋數椽
其地在何所潘家河之嚶門外新桃符室中舊青氍祭

竈請比鄰見笑諸英賢不敢謁一客客至不敢延必欲
見過者亦樂與周旋布衣而朱履禮法皆所謁報謁在
何時期於出京前更與諸公約衰老宜從便一不入酒
坐二不登歌筵長安人海中若無此叟然待過四月望
一笑吾其還

汪柳門閣學徐花農太史載酒見訪賦謝

諸君爲我洗瓶罌又念衰翁嬾出行仍仿右台山館例
往年在右台仙館花農每載酒相訪倍徵東道主人情清和且喜宜春服
脫略幾忘在帝城只惜彭庵老居士此時杯酒未同
傾

花農率去年秋闈分校所得士來見賦此紀事

漢以受業爲弟子轉相授受爲門生此義發於歐陽公
雖不盡合非無因古人學問重家法淵源雖遠烏容泯
世子芋子公孫子亦許來問洙泗津請觀漢書儒林傳
自某傳某皆具陳李唐以來重科第乃亦相沿用此例
既有座主有門生門生門下自宜逮五代流傳裴皞詩
不與鯉庭桃李異由來一榜盡通家合向祖庭稽譜系
鄙人老矣臥空山長安舊跡皆從刪精舍舉比聊復據
玉堂鈴索無由扳徐陵才調冠吾黨二十餘年相往還
雖以文章相契合實與骨肉同交關去歲秋闈預分校

蒐羅蘭茝芟榛管得士一十有七人森然玉筍排成班
亦援此例來見我我轉對之生慙顏豈聞輦轂冠裳會
施及山林泉石間惟喜坐中諸俊又瓊柯玉樹交相對
幾人翰墨有前緣鄧君應潢爲湖州太守幕中客余幾
孫陞雲應府試取第一君與閱卷幾
輩英雄留後代吳君昌坤乃國初吳順恪之後卽世
所傳大力將軍者也王君輝乃道光中
定海死難王剛節公之曾孫布衣朱履曲園翁得無自顧慙形穢轉
瞬春風藥榜開大羅又結羣仙隊再持白束叩吾門十
七科前前後後輩

金孝女詩

孝女名爾英秀水人七歲喪母事父至孝有問名者

曰願終身事父不二天也行年四十先其父卒

齊國嬰兒子終身奉二親後來無此孝今又得斯人願以童真老休將禮法論勝他巢許輩不仕廢人倫

彭麗松孝廉八十壽詩

秣陵傾蓋記初逢皓首龐眉六十翁

丙寅年與君初相見於金陵曾文正

師幕

年齒推排宜北面

君許余以兄事

淵源契合有南豐

文正師爲

府君老

節堂高會羣英集

文正師會東南諸名士講舍清觴余於節署君亦在坐

講舍清

尊一笑同

余曾招君飲於吳中紫陽書院

不覺光陰逾廿載前塵昔夢

太愍愍

見說精神尙未衰行年八十近期頤姓名久仰鄉先輩

著述親傳易祖師間新刊高弟春風晨夕共佳兒秋駕

後先馳君七子舉於鄉者四人膝前攜得嬌孫在玉樹瓊柯弟幾

枝君攜一孫同住船山書院

講院船山締造初便邀長者駐高車彭雪琴尚書創建船山書院延君主

講諸生都向道旁拜此老猶能鐙下書經義兩齋安定

例元亭千古子雲居試從退省庵前過白髮尚書歎不

如

頻年吳楚悵睽違幸與諸郎遇帝畿於都下見君三子樹森字

櫻初言字字石愚芳信傳來雁北向清歌唱到鶴南飛

敢煩行輩君頻折君因言孝及藝皆與余自愧精神我

孫陸雲同年稱謂甚謙

轉非安得江南重訪舊湖樓山館共斜暉

出都留別諸君子

恩恩催上路河舟不覺懷然淚欲流須念殞齡將七十
豈能後約訂三秋柳門花農諸君皆期雖承良友殷殷
意徒惹衰翁黯黯愁記得先人詩句在殘年未必再來
游先君於甲辰年六十四歲下第出都有詩云寄語杏
花休戀我殘年未必再來遊余今年六十六歲又加
二年矣安能再來乎

余見家人輩所持扇有京師者有河南者有江西
者有廣東者有福建者有湖南者有日本者有高
麗者至江浙閒所有固勿論矣因賦詩記之

午晴溽暑逼簾櫳坐上招涼各不同五月未交三伏日
一堂先動四方風巧偷月樣從天上妙翦冰綃出海東
只有老夫珍舊物狐裘卅載共蒙戎余用一羽扇二十年幾與晏子狐裘等壽矣

中秋之夕與兒婦孫兒女外孫兒女輩曲園看月
口占二絕句

大好光陰八月中最難有月却無風盤中瓜果盆中餅
也學吳儂拜月宮

不醉中秋已四年

或無月或適有事

偶乘清興一流連展開八

尺冰紋簟席地團團坐月邊

時新得東洋疊席陳之曲水亭中席地而坐

滬上盛行學詩捷徑虛字注釋誤字辨正諸書不知誰作而皆託名於余賦此一笑

虛名我已愧難居假託微名更覺虛邵武士爲孫奭疏齊梁兒造李陵書虎賁入坐非無辨贗鼎欺人或有餘不解慶虬之作賦如何總說是相如

題唐六如集卽贈易笏山方伯笏山自言六如後身也

桃花仙館久荒涼賸有流傳翰墨香明代兩人眞可惜解元唐與狀元康

六如皆幻本非眞明月居然有後身珍重遺詩與遺書

一齊付與再來人

孫琴西同年和余罍字韵詩因疊韵寄贈

老來才盡似空罍燕市春風又一行黃榜姓名如隔世
白頭兄弟尙關情近聞講席虛鍾阜大可行窩寄石城
舊日朱軒今絳帳遙知多士定心傾時金陵鍾山書院
講席尙虛曾沅浦
制府欲延令弟葉田前輩主之葉田
未決余謂如葉田不就君宜就之也

題烏山土神廟壁

吾邑烏巾山烏巾氏故蹟借問烏巾誰父老無能數吳
興之烏亭相傳在昇山亦云烏巾氏寄跡於其間烏亭
誰爲之右軍王逸少吾以右軍故偶憶張宏號張宏號

烏巾三國孫吳人篆隸皆擅場飛白尤入神右軍爲斯
亭必爲斯人築當以工書故羲獻皆私淑吾邑與接壤
地無百里遙安知張烏巾不於此逍遙茲山名烏巾名
當從此始廣韵烏字下不載烏巾氏可知烏巾氏唐前
未有聞柰何沿俗說不知有張君吾擬築烏亭卽於茲
山麓先出此一篇敬爲父老告

吾爲烏山詩猶未盡吾說茲因讀真誥一說更奇絕漢
末瀋子斟隱居烏目山因遇慧車子而得出世間然而
烏目山圖經所不錄遂令陶隱居疑卽是天目天目與
烏目名義固已殊安得逞臆見易天而爲烏晉謂烏不

訛目乃帽之誤帽字古作冂誤由形似故烏帽卽烏巾
巾帽義則均此雖異前說或亦可附陳吾家先人廬卽
在茲山輦倘遇慧車子執鞭吾所欲

蔣烈婦詩

烈婦姓黃氏少失怙恃九歲以童養婦歸於蔣十八
歲成婚甫逾月蔣氏子死死百日依其鄉之俗禮祭
於墓其夜縊而死

未同牢先執帚侍兩代姑九年久甫好合俄孀居合二
姓歡一月餘合歡止一月祭墓俄百日百日祭墓歸吾
事則已畢上堂視舅姑入室撫遺孤舅姑幸無恙嗣子

啼呱呱乃反其私室乃寢乃燕息小姑與同牀覺來一
鑑黑半衾虛無人驚呼聲不出一繩高挂牀頭羸徧體
衰麻仍如荼周身繭續胡爲乎此意分明語小姑我死
勿使男子之手親我膚

任烈婦詩

烈婦姓蔡氏爲任明經錫庸之妻明經甫得拔貢生
未會考而卒婦死之

烈婦年十五升堂拜姑章明年十六歲夫壻餽於庠逾
年年二十夫壻貢玉堂玉堂猶徘徊玉樓俄翱翔烈婦
曰已矣誓將從之亡白頭姑在前黃口兒在旁謂宜緩

言一
須臾於義夫何妨竟不緩須臾激烈殊乎常有
天子詔敕建門前坊下有文人筆百世流其芳

瓜勒嘉節婦詩

節婦滿洲人姓王衣氏爲瓜勒嘉氏圖幹恰納字廷
玉之婦廷玉卒節婦請翁娶繼姑生子觀成翁旋卒
婦與姑共撫之至於成立

夫死請立嗣是亦人情常婦則曰否否吾有翁在堂與
其別立嗣不如翁生子翁生子有孫吾夫有子矣乃跪
於翁前請翁續斷絃翁固鑒其誠天亦報其賢翁子今
成立不敢忘嫂氏嫂實撫我躬嫂實延我祀其節固可

敬其識尤堪師謂余不信者讀憶兒時詩其夫弟觀成有憶兒時詩

樂府體

九解

送女壻許子原北上

蕭瑟西風賦北征女亡壻在總關情五年黃壤無從問
萬里青雲又此行往事回思如一夢老夫相見恐來生
未知得第歸來日能否湖樓酒共傾距已丑會試尚四年

重九前一日至杭州湖樓山館小住月餘得詩十
七首

西湖不到已經年婦豎相逢盡有緣都道年年看此老
如何鬚鬢總如前道旁一女子其言如此

寒露將交暑轉加無風無雨亦堪嘉重陽來就菊花約

剛好天公烝

上桂花俞樓桂花盛開

竟日賓朋滿敞廬宵來一枕且蘼蘼湖隄靜不聞街柝

只聽僧房敲木魚

中興李郭盡相知未識文襄袞鄂姿今日跨虹橋畔路

扁舟來訪左公祠

聞新建左文襄祠將次落成晨往一看

花神廟在左祠東能否還如往日工此後文襄前敏達

美人畢竟傍英雄

左文襄祠即花神廟故址因仍於東偏建花神廟從前花神塑像極工中

奉湖山正神相傳卽李敏達公也

清夜來游退省庵要看明月印三潭健兒驚起眞堪笑

匪寇張弧竟誤占

月夜至退省庵時門已闔呼於其門守者驚起疑爲寇至

一年三度佛生辰冠蓋先期集水濱深感諸公能折節

拜觀音了拜山人

二月十九六月十九九月十九皆爲觀世音生日浙中自中丞以下

皆前一日至天竺行香余如在湖樓則諸公出山必來相訪今歲來此適逢九月十八也

映水芙蓉豔似霞階前書帶翠交加今朝天竺燒香去

買得觀音髻上花

十九日使人至天竺燒香買得觀音花二朶以歸問之識者實卽良薑花

山中人美其名以給香客耳

靈蹤猶記昔年留一樹靈松今尙稠四異此番添作五

金華神又降俞樓

金華神曾降於俞樓之松樹故建有靈松閣余作俞樓四異詩此其一也

今年九月十九日又降於俞樓之庖廚時已薄暮卽具香燭飛棹送之歸廟

湖樓未算是幽棲策杖來尋山徑蹊新築墓門高一丈

右台山鬼手親題

今年於右台山館前建立墓門一面刻俞氏墓道四字署曰曲園白題又

刻一小印曰右台山鬼傍刻一聯云且喜故鄉無百里敢期此後有千秋一面刻溫愛世界四字即余夢中所見也事具第九卷詩注旁刻一聯云不妨姑說夢中夢自笑已成身外身

老龍井到虎跑泉歲歲清游成例沿徧歷九溪十八澗

理安寺讀舊題聯

從龍井寺歷九溪十八澗於理安寺小坐至虎跑泉而回余自癸酉至今

如此游者數次矣理安寺懸余一聯云竹筧潛通十八澗蒲團小坐兩三時猶甲戌年所書也

聽取烏烏野兔聲空山夜靜少人行何來老鹿惟三足

才不荒墟時一鳴

山中有鳴聲烏鳥者實即狐也諱之曰野兔又有一鹿不知何年斷其一

足至今才不而
行厥聲頗異

驚來相告語聲囂爲報精廬一炬燒回憶無邊好風月

自慙德薄福難消

十月初六日詰經精舍第一樓不戒於火館人來告時已半夜矣樓有風

月無邊四字額彭雪翁所書也

無端村落聚豺獍白晝柴扉處處關頓使草堂增氣色

森巖刁斗警空山

有流民聚居村落或言皆非善類因函知劉吉園總戎命健兒入山干欺

高下松楸稌舊新須知我亦此中人括蒼太守來相訪

笑說他年是比较

新補處州陳鹿銓太守入山相訪自言所卜佳城近在咫尺

湖樓尙擬暫徘徊忽漫歸心一夕催不獨菊花虛未賞

女蘿兩樹欠攜回

初擬出山再至俞樓因孫女隨行偶患瘡疾遂卽回蘇王同伯比部餽菜

花四十盆在湖樓末一見雪舟和尙餽女蘿兩盆在山館忘未攜歸

越水吳山歲歲經水程未暮棹先停今宵喜借颺輪力

穩載魁星與壽星

江浙間夜不行舟五十年矣此次因借小輪船曳之而行竟夕不停自杭

至蘇歷時凡九余時出新意爲魁星壽星兩像在杭州刻版攜回

王氏子婦哀詞

婦姓孫氏王夢薇之子婦也

我與夢薇友知其子婦賢何以知其賢乃其翁云然翁曰婦來前吾有文一篇汝爲我書之勿使訛烏焉翁曰婦來前吾事紛聯翩求書者接踵索畫者隨肩門前客幾輩案上書幾箋汝爲我識之勿使淆後先婦曰謹受命翁毋心悵悵翁曰婦來前我母病未痊飲食宜有節斯責惟汝專婦曰謹受命以意爲節宣小而餅與餌大

而粥與饘多寡量所受取求隨所便母乃大歡喜宿疾
皆如調翁曰賢哉婦翁曰悲哉天天胡奪我婦不令歲
月延是故曲園叟謂此婦可傳何以傳此婦乃翁語可
憐

花農自都門以綠菊花二朶寄贈菊之綠色者殊
罕見花譜有名徘徊菊者白瓣中微有綠色豈卽
此乎賦此以答花農

菊花百五十三種燦爛西風豔似霞鑄就黃金雖有色
彫成碧玉更無瑕山中高士陶彭澤世外仙人萼綠華
花已徘徊人又甚幾回遙望暮雲遮

書京師同文館中西合曆後

春秋書春王諸國不一例晉史用夏正遂與麟經異往
往春所書是其冬之事自漢太初歷始改用夏正後世
遂循之歷唐宋元明二千餘年來不知子姒嬴佛說四
種月一日月二人間月三月月四星宿月頗與中國別中國與印度所差
有半月遐荒自成俗短長誰與絜赤明及龍漢道家年
號殊清甯二百年新宮銘所書要止廣異聞誰與徵居
諸惟聞瓜哇國入貢宣德閒自言千三百七十有六年
當時究其始謂從鬼國傳天魔夔罔象誰復窮其然我
朝大一統聲教及海外海外大九州咸來赴王會諸

國用西厯推步自稱最中西各一天異同無乃太丁君

精西學

丁君字冠西同文館總教習也

乃思觀其通中厯與西厯合之

一編中丙戌冬至始丁亥冬至終不憑月晦朔而憑日

過宮佛所謂日月不與月月同唐有朱希真感時淚成

陣藤州與梧州互異大小盡同此歲三月如何分域畛

追念昇平時大小有定準此事與今殊腐儒休妄引獨

念我

聖清超軼漢與唐魏魏乾隆朝萬里開新疆

每年十月朔正朔頒明堂大小兩金川一一列上方烏

什沙雅爾節候今猶詳明年丁亥春

皇帝始親政

小臣愚無知歌詠共田畯伏念內治修斯能外侮勝富

言二
教語本孔省薄策用孟行見光緒年迫復乾隆盛仁者
自無敵制挺不待刃彼海外諸國來享兼來王豈敢以
鱗介而妨我冠裳年年賀正月國國列職方司天班正
朔普及東西洋奉到時憲書一例陳餼羊

丁巳編

春在堂詩編卷十二

丁亥元旦試筆

算從七歲到今茲丁亥流年又遇之天克地衝雖厄運

辛巳生人遇丁亥歲為天克地衝年豐人壽是昌期每年元旦司天例

休援午日持齋例丙子姚夫人為余午日持齋事見百

行之絲裳又卒其却憶丁科應試時余丙申年入學丁酉初應鄉試中副

榜十載光陰如許假尚堪重賦泮宮詩

用洗蕉老人除夕詩韵述懷老人乃憚次山撫部之夫人

春信纔回爆竹中又看太簇律將終時已正月之末廿年只臥

茂陵雨萬里誰乘宗慤風銅柱勳名傳久遠吳清卿中丞以勘定

中俄邊盼所立
銅柱楊本屬題

玉堂詞翰鬪精工

徐花農太史寄詩來甚多吳徐兩君皆余

門下

坐看諸子飛騰去老我積唐不諱窮

寂寞楊雲不解嘲一樽且復剖霜匏浮生似磨勞仍轉

世事如棋嬾更敲坐上衣冠從脫略案頭筆墨總叢淆

唐書陸贄傳案牘叢淆

虛名浪竊真堪笑徒使悠悠歲月拋

青浦金友筠明經文潮匿姓名與余書余屬青浦

校官陳子愚訪得其姓名寄詩戲之

堪笑林陰仰雪翁

其寓名也

居然荷篠丈人風楚狂歌鳳無

名姓早有人知是陸通

日本陳子德以其國所出紙布見贈爲賦紙布詩

宋時蘇易簡曾撰文房譜謂紙可爲衣其法傳自古用紙滿百幅胡桃一兩許乳香亦稱是三物同一釜熱氣炯炯然或烝或竟煮煮熟乃乾之勿使臭且腐捲之以箭幹用笥去其羽居然積尺寸初不襍絲縷微嫌窘邊幅不免勞綴補頗聞黦歛閒其製乃更巨所造紙衣段幅長可竟戶士人亦服之道塗禦風雨又或從佛戒不衣蠶所吐以上並蘇說我疑或謾語有客東海來爲我談風土始知紙可衣古人不誑汝爰寄一端來遠自重洋賈其色涅不緇其質柔可茹其長可三丈其重不百黍婦豎相傳觀驚歎謂未覩我思布一耳品類不勝數

冬日則以棉夏日則以苧以草有荃葛以毛有璫璫

古郎

切西海水有羊南荒火有鼠槿樹花離離簞竹葉滑滑

蔡侯昔造紙微材到網罟樹膚麻頭外敝布本所取旣以布爲紙捫踵費白杵又以紙爲布剪裁禦寒暑物變固無窮良工心亦苦稍與蘇說殊彼不待機杼此則有經緯尙可見端緒經仍以木棉緯以紙爲主想見工女勞一月三十五余幼好奇服垂老猶童豎亟命付裁縫聊可詫朋侶人笑太拙麤我喜便輕舉曳裾卽出游奮袂旋起舞倘得十萬賸直可無錦組請移黃婆祠來祀先生楮

彭雪琴尙書舊蓄一鶴近忽羽化慰之以詩

有鶴相依數十秋一朝化去不能留
老天亦徇蒼生意未遂先生寥廓遊

春風大旆又東行鶴豕遙知早已營
寄語羽童休戀戀過三十載再來迎

三月三日自蘇之杭以小輪船曳之而行

乘舟安得順風行人事居然巧與爭
佛法金輪能運轉仙機丹竈不分明
一繩足抵千帆力半刻能兼竟日程

我是閒游適相肖飛來飛去片雲輕

舟名飛雲乃假之
崧振青中丞者去

歲自蘇至滬
亦假此舟

余主講詁經精舍自戊辰至丁亥二十年矣開課
之日招見在精舍肄業諸生小集俞樓侑之以詩
文字湖山兩有緣直從中歲到華顛同思初擁皋比日
只算重交弱冠年濯濯柳皆成合抱余初至西湖湖隄
無一柳樹今則成
陰呱呱孫已忝興賢余孫陸雲卽
於戊辰年生一樽戲爲諸君設二
十生辰湯餅筵

越中紀游

自向西陵放畫橈輕舟容與路迢遙不知曲折通何處
處處河流處處橋

蕭山城外儘徘徊水近湘湖綠似醅沿路香風吹不斷

黃雲兩岸菜花開

南錢清接北錢清閒倚蓬窗玩月明卻笑蘇杭來往路
斜陽未暮不教行

天然廣廈頗瓏玲二十年來兩此經一朶奇峯依舊好

舊遊人已半凋零

七星巖舊稱煙霞洞有明胡梅林刻天然廣廈四大字憶辛酉與內人攜

兒女輩同游至今二十七年矣

當門老樹綠參天如此家居儼若仙攜得嬌孫隨杖履

山中一隻是同年

游七星巖遇茅孟淵孝廉立仁乃余孫陸雲同年也年五十三矣其家門

戶修整門外大樟樹數百年物

盤就金身五丈修巧將山骨細雕鏤誰書竹垞閒言語

詩十二

四

空惹靈山老佛愁

七星巖傍普照寺有石佛高五丈不知何人所鑿亦鉅觀也

堽先生記一篇應考古來佛像之大者而以金碧皆民膏血爲佞佛者諷然竹垞此記本非爲此寺而發書此

殊無謂也

遙望柯亭頗鬱盤中郎祠小不堪觀只餘一席魁星閣

遠景收來十里寬

途經柯亭遂往遊焉實則一魁星閣耳雖可望遠而個仄殊甚下有蔡中

郎祠亦嘈雜無足觀

金臺歌舞幕還朝寂寞楊雄耐客嘲今日來看村社戲

畫船簫鼓鬧周橋

周家橋有龍船之會且以河臺演劇遂往觀之維舟臺畔坐臥皆便亦一

樂也余在京師不觀劇故去歲在都下有一不入酒座二不登歌筵之句兒輩舉以相質余笑曰在周家橋則

可

精廬小築號雲泉內有雲根高插天石壁微凹劣容膝
老僧於此坐三年將至吼山有佛舍曰雲泉庵中有奇
峯拔地而起高可千仞山罅有小穴
片石覆之昔有老僧於
此閉關而坐者三載

吼山山石太離奇石骨嶙峋水活之柔櫓輕搖入山腹
曠如門戶奧如帷吼山水石宕山水絕奇舟行可深入
山中盤旋而出惜屋宇不精無可久
坐

歸途更入繞門山一樣舟行水石間可惜世無好事者
不將水榭築迴環繞門山與吼山風景相似但稍
淺耳其地並無屋宇不及吼山

路旁突兀孝仙亭欲覓殘碑未有銘更有小祠祠孝女
擬從父老訪圖經孝仙亭近繞門山孝女祠即
在山下皆不知為何人也

大禹陵存禹井荒尙留子姓奉蒸嘗年年六月逢初六

都向陵前奠酒漿

禹陵遇妣姓者自言大禹之裔尙存百餘家每歲元旦及六月六日禹生日率子

孫祭奠

荒涼禹寺少人來扇扇窗櫺寸寸灰爲有唐碑須一讀

雙扉苦遣道人開

禹寺正屋三間荒涼殊甚內有唐開成年往生碑

巍巍南鎮會稽山且賃籃輿一往還遙望香鑪峯斗絕

不教兒女強躋攀

游南鎮未登香鑪峯因二兒婦攜兒女侍游故未克登其巔也

氣清天朗惠風和此語昭明指摘苛我向劉龔村裏泊

迅雷甚雨待如何

至劉龔村將賃輿游蘭亭適遇雷雨遂留待明日

蘭亭未必竟如前風景依稀尙儼然峻嶺清流林木茂

千秋長似永和年

將至蘭亭風景絕佳所謂崇山峻嶺茂林修竹清流激湍至今如故也

金吾捨宅

國初時小小精廬處處宜只有疑團難問

佛如何遺蹟託蓮池

小雲棲舊名興教院寺僧言蓮池下院也然此院本明金吾朱公佩

南之別墅康熙己丑其妻張淑人捨以爲寺其族孫題記甚明不得云蓮池遺迹小雲棲之名所未詳也

臨水登山興轉增恩恩五日返西興未尋大吉磨崖字

未訪冬青宋六陵

廬舍庵記事

我聞有明萬厯中織造太監來孫隆自建生祠在湖上
巍然西泠橋之東無何鼎革入 昭代遺址零落埋蒿
蓬盧公雙泉居此職始還舊觀仍蔥龍大殿奉佛廬舍

那庵祠一變爲梵宮盧舍庵名從此起似寓舍宅由盧

公孫東瀛像亦不廢權作佛寺伽藍供我讀遺碑考四

至其西比鄰郭孝童

郭孝童墓今尚在然隔以蔣樹祠矣知彼時庵址頗廣也

於水活水族凡鱗常介靡弗充傳聞春秋好風日門外

常駐遊人驄庵僧賣茶頗獲利坐上客滿皆盧全已而

庚申遭大劫四顧無復積垣紅去歲有僧曰林泉忽來

闢治地數弓小築三椽劣容膝但有菜桷無垣墉今年

三月初八大風斗發聲逢逢一吹而倒俄頃事機崩

棟折四大空我憫此僧遂露處薄有所助慚不豐又爲

徧告諸同人翼日皆至其數同僧大歡喜佛亦笑大悲

小閣堪成功或言此庵本非古楸人遺蹟何足崇豈知
神奇出臭腐往往變化殊初終不見裴家綠野堂舊屬
李家三伶工裴晉公綠野堂乃開元樂工李龜年鶴湖
年彭年第宅之中堂也見明皇雜錄
上精廬半殯圯得此亦足停遊蹤小詩聊復記其事奚
必碑石重磨礱

雪琴尚書以霜字韵詩寄示次韵酬之

出入兵閒四十霜風雲際遇慶明良功成朝野威名在
病久江湖舊夢涼大樹猶新人已老梅花如舊鶴先僵
尚書所畜
鶴新斃
曲園尚有百杯約往年有此約至
今未滿其數莫負秋宵

月照梁

傅氏婦三割股女再割股詩

烏乎割股何事邪一之爲甚至於是眞忘其身所苦
而但行其心所甘夫病三危三活之至今鄉里爲美談
吾獨異其弟二次夫南妻北兩異地數千里外聞夫病
惟有寸心可自致於此奏刀彼霍然如響斯應吁可異
乃知割股事無他但以至誠動天地其事有效有不效
其誠有至有不至稍有豪髮近名心卽屬虛夸無益事
勿信人肉治虛羸邪說誤人陳臧器傅氏之婦何其賢
割股救夫夫病痊夫曰此事良可傳婦曰吾不求名焉
德清傅懋元雲龍妻李三次割股救夫病其第二次則
懋元在德清葬親李在京師聞懋元病禱於天割股肉

隔數千里而割股之夕懋元即愈以書來告臧獲皆稱異烏乎傅氏婦則賢傅氏有

女尤堪憐其母以殤幼子故臥病枕席久不痊女時年

甫十有五見母病危涕如雨傍徨無計起沈疴惟有背

人私割股割股食母母有瘳無何兄又病於喉女曰兄

死母亦死塊肉又爲兄創副一弱女子能辦此固宜名

氏勤 天子乃女有弟年十二亦效爲之如其姊舊

史俞樾聞而嗟曰賢與孝萃傅氏傅氏女即懋元女其母即李也其弟曰范

晃戶科給事中洪良品以傅女事聞旌如律

慈谿女子張貞竹字碧筠年十有二能書盈丈大

字陳鹿笙太守屬其書福壽龍虎四字見贈爲賦

此詩

昔聞順德李氏兒四歲能書盈尺字

李名世與明萬歷時人

御史

馬公巡廣東抱置膝頭所親試童子已奇女更奇如張

碧筠吁可異大字長至一丈餘妙齡小止十有二括蒼

太守書家雄羊眞孔草靡勿工亦復傾倒此女子爲之

延譽諸名公寄我雲箋大如席一箋一字猶嫌窄四字

福壽虎與龍紙色銀光文則亦

四字皆朱書

古來奇女盧眉

娘繡七卷經一尺方彼以其細此以鉅並推絕技無低

昂老夫嗜奇素有癖對之起舞喜欲狂取配明人大魁

字樂知堂上生奇光

余家樂知堂上縣明人王時泰所書大魁字其字刻石在山東汪柳

門學使揭
以見贈

送門下士井上陳子德歸日本

日東遙望海茫茫送子吳門酒一觴萬里歸人同晁監

唐王維有送秘書

晁監還日本詩

三年吾黨得陳良攀吟宰樹情何極

將拜其師得能局長之墓

起舞斑衣樂未央

其二親均無恙

更願異時仍過

我尊前重與話扶桑

徐花農京寓所栽五月菊忽成異種數朶合而爲

一折以寄贈爲賦一律

不惟並蒂又連心想見天缸醞釀深習鼎○文雙琢玉

習鼎有○字釋爲環字

梵書○字亂堆金

佛書伊字作○

辨多儼剝同功

蘭枝重如棲共命禽璧合珠聯才子筆定教譜入墨池

吟

花農與徐侍即用
儀有墨池唱和集

寄贈張朗齋中丞

昔年申息久聞名今歲丁沽喜識荆文法真從老泉得

君極喜蘇
老泉文

神功能與大河爭

時奉
治黃河

命秋風弓劒天山

道春色旌旗海岱城偶作小詩書便面知君結習尚書

生

此詩因去年爲君書扇率筆作此久失其稿今年君
書來致謝因追憶而補錄之故有今歲丁沽之句實

去年
事也

盆蘭中有一跗而九瓣者中有雙心連合爲一亦

異品也折賜陞雲係之以詩

一枝插向膽瓶斜，合蒂同心亦足誇。
簇簇繁英舒九瓣，垂垂小朵並雙桺。
蘭房駢種宜男草，藥榜聯開及第花。
折付阿孫殊有意，老翁望眼十分賒。

孫婦彭氏歸甯，衡陽夢中賦詩二句，送之寤而足成一律。

六年夢繞舊妝臺，歸慰慈親笑口開。
不遣吾孫偕汝去，要期後歲奪元來。
此二句一雙嬌女商行止，攜其長女去，留其次女在。
七十衰翁伴往回，謂親家翁記取春風正二月。
曲園遲爾共探梅，雪琴尚書

落葉

次洗蕉老人韻

掃盡巢痕舊燕鶯滿天霜氣曉來清平添夜月三分色
略減秋霖幾陣聲蔭暘竟違平日志歸根頗動暮年情
積唐不學飛蓬樣嬾逐長風到處行

落木蕭蕭景最佳今年游屐欠安排亂山荒徑難尋路
古樹斜陽易感懷敝帚千金聊坐擁斷琴三尺已深埋
此生不作南柯蟻休問榮枯到大槐

恩恩節序九秋臨無復花陰與柳陰寒士衣裳未裁翦
美人詩句久銷沈驚沙滾滾流難塞伏莽重重跡轉深
莫向亭皋頻極目蕭條千里總傷心

秋風不設護花鈴任撲雲亭又水亭薜荔牆垣猶有賸

梧桐院落最先聽爛紅乾翠都堪惜轉緣回黃不暫停
我亦人閒一蒲柳敢同松柏鬪遐齡

題故人孫蓮叔剪燭談詩圖爲其孫澤臣作

昔年我作新安客得與興公共晨夕我因拜母屢登堂
君爲通賓常置驛是時家世劇豪華千戶侯封未足誇
門館客酣金谷酒市樓女看璧人車百萬黃金揮欲罄
凌雲意氣依然盛酒友詩朋會似雲燭奴燈婢圍成陣
無何大劫遭紅羊倉卒全家竄道傍蟻子蚍蜉誰赴救
蟲沙猿鶴竟偕亡覆巢完卵雖餘二集苑集枯今昔異
惟存紅葉讀書樓

君家樓名

猶賸當年題榜字人閒轉眼卽

雲煙何況遙遙四十年荒冢誰來尋宿草暮年我亦感
華顛無端有客來吳市太息一寒胡至此風流非復越
王孫落魄居然康老子篋中檢取舊時圖請以今吾認
故吾圖中二人一爲蓮叔一即余也然不可復識矣紅燭談詩當日共青燈讀
畫此時孤不獨形容渾異昔即看字跡今全別圖中有余題詩
字跡娟秀老女重描舊畫眉寒禽難學初調舌萬事酒
滔付逝波王侯將相總銷磨汾陽門巷疏槐冷梓澤園
林蔓草多老夫久悟浮生寄却爲斯圖重隕涕眼看葛
帔感窮交手撫銅駝悲往事和淚題詩對短檠雍門一
曲不勝情舊人無復何哉在誰與殷勤唱渭城

光緒十四年正月十二日甲子是日逢金又值奎宿相傳金奎甲子爲文字之祥祭之者吉因命孫兒陞雲祭焉并勗以詩

辰辰吉日喜重經

同治十二年二月十五日金奎甲子陞雲始入塾

再爲吾孫

一乞靈倉史造文先甲子

見駢冠子

宸垣示象本奎星

說本日知

錄

黃金待鑄金門榜青鐵先鑄鐵視銘能慰阿翁癡願

石棗糕明歲祭中庭

御史大夫祁子禾先生用堪字韵見贈四叠韵報之

正擬徵詩續廣堪

彭雪翁屢勸余作詩話未果廣堪事出周書蕭圓肅傳

詩來如

其德公談清芬竹葉杯浮百雅韻梅花笛弄三官貴待
調先世鼎學成更築老來庵閒情尙憶蘇堤上三面青
山西北南

約略杭州說尙堪漁歌樵唱雜街談神祠擊鼓口○半

西湖春來進香者多鳴鉦鼓

卜肆搖錢一一三

香市盛時

口讀方○讀圓見禮記投壺篇

間有賣卜者一讀單一

春早探梅到林墓秋涼載月

過彭庵令人頓觸停雲感何日輕帆發楚南

時彭雪翁尙在衡也

笑我衰慵百不堪殞唐近狀與君談貧惟杜老長饒一

富有容齋續筆三

時又纂茶香室三鈔三十卷未刻

山爲宅幽題退谷

室因娛老署頤庵祇應未斷閒吟興時盼傳書雁到南

日下賡歌豈我堪。擁鑪聊當一宵談。大千春色將過半。
七十流年不欠三。白香山詩相看七十欠三年乃六公
十七歲時作也余今年六十八矣公
等相將趨鳳闕。老夫隨便築漁庵。滄江一臥居然穩。不
作悲歌董邵南。

文昌生日歌

春王二月月三日。世傳是日文昌生。上自京師下郡邑。
一例崇祀陳犧牲。老夫今朝亦蚤起。雞魚豕肉盤中盛。
內外諸孫咸會集。衣冠羅拜當軒楹。或言文昌乃星象。
不聞入夢符長庚。云何隨俗作生日。是以非禮誣神明。
我謂文昌星有六。昭回於天同列宿。上擬三台乃其倫。

周禮先鄭說司中三能也司命文昌宮星

下儕七祀則已黷

祭法七祀有司命熊氏云非天

命之司至於後世祀文昌僉謂其神出於蜀附會河圖括地象帝以會昌神建福梓潼灌口各爭雄割據兩川分鼎足又謂其神實姓張天上張星豈同族張仲孝友猶可言若張惡子無乃辱文昌化書真可焚并謂降生入蛇腹以此事神神弗歆我有一言告流俗東漢梓潼有文君班范兩書都無聞我讀隸釋始得之周公禮殿記所云當時高朕修禮殿不欲湮沒前人勲云自梓潼文君來已爲茲土興斯文文君名參益州守實與文翁同不朽華陽國志亦有之其姓則然名則否志云文齊字

子奇西漢末已登朝石梓潼人拜益州官王莽公孫詔
不受有子曰恠守北海一門兩世拖青綬又有文恭字
仲寶斯人或亦文君後乃知文氏在梓潼門第不與單
寒同已見傳家有簪紱豈其廟祭無鼎鐘始奉烝嘗惟
子姓後遂播滿川西東檀弓物始昧所自籍談數典忘
其宗當年私建文君祠此時大啟文昌宮傳訛不比石
賢士秋祀宜偕應上公雖已文章煥奎壁豈忘弧矢縣
桑蓬降生難考庚寅始紀年諒不甲午終禮殿記有云
至于甲午
猶幸遺聞出故老長留初度傳無窮神再生日六月六
至今歌舞塗山童老君生日九月九至今奔走黃冠翁

固宜援引作生日未容泯沒隨飄風烏乎古人已死無
定名古事已往無定評酆都君爲陰長生二郎神疑趙
仲明均詳見茶
香室叢鈔訛傳千古事所有奇論一出人皆驚我
歌此詩爲神壽沒而爲靈生爲英傳說列星古有例何
妨仍唱升天行起視奎光長萬丈依然照我東西榮

清明後一日登舟如杭州二兒婦攜孫女曾孫女
從焉許氏兩外孫女亦偕往

秋風未到武林城

去年秋因病
未至杭州

今歲春風又此行四代

都盧皆骨肉一年容易過清明且圖領略沿途景莫漫
流連往日情只恐武夷君笑我曾孫嬌小太憨生

嘉興三塔灣詠妙諦和尚事

事見國朝徐承烈所撰聽雨軒贅紀

昔在勝國時倭患東南熾蘇杭皆被兵嘉禾寇亦至禾
中三塔灣塔旁故有寺倭掠諸婦女累累此閉置寺僧
醉守者縱使悉逃避倭歸得其狀大怒相詬詈縛僧石
柱閒叢鏃射之斃積薪焚其屍屍毀血猶膩至今三百
年不與當時異厥顛尙宛然肢體亦略備我聞宋建炎
有寇寇延平一女爲所掠以死完其貞橫屍大道旁歲
久迹愈明雨乾晴則溼奇蹟人皆驚此僧與此女雖死
無殊生意氣一朝事蹤跡千古傳乃知不壞體惟在片
念堅維舟三塔旁石柱猶巋然榜人指而告過客歎且

憐訛傳在 國初其名無聞焉我爲作此詩軼事徵由
拳此僧名妙諦事在嘉靖年石柱猶未泐吾詩儻可鐫

唐棲水嬉曲

棲溪春水明如鏡歲歲水嬉今歲盛花果欣逢比戶豐

其民皆以
花果爲業

村民早鼓先期興先期童稚習歌謳土穀祠

邊眾聚謀拜殺荆劉看曲木

拜殺荆劉爲元曲中四大
家見宋竹垞靜志居詩話

旂盛雜把製行頭

戲具分旂
見李斗揚州畫舫錄

畫船彩幟風

前颭兩兩相維成巨艦百寶莊嚴貫月槎萬花絢爛移

春檻一時簫鼓鬧如雷齊向長橋河下來後舞前歌花

世界東舷西舫蜃樓臺樓臺歌舞來相續小與酬勞殊

太薄片片蜂糖玉帶糕條條鳳蠟金花燭

是日諸船皆
嚮余舟演劇

一陶塙以糕
餌及燈燭

燭龍入夜更蜿蜒燈火高高下下懸竟可

地名星宿海錯疑身到燄摩天清明時節沿成例

是會
皆在

清明
前後

點綴昇平殊有意巧借隋宮水飾圖別翻唐代梨

園戲我偶輕舟到此維翁孫四代共扶持水嬉亭畔聊
乘興不是風流杜牧之

次韵寄孫琴西同年

幾人張丈幾般兄垂暮相思倍有情世事佛言如夢幻
吾儕天使以詩鳴只愁古井波將竭看取新田莠已萌
猶賸殯唐兩愚叟漫歌一曲唱同聲

日本人佐藤楚材字晉用行年八十有八賦詩徵

和爲賦此詩

一箋飛到詫伊誰想見吟成笑撚髭敢謂新羅知穎士

且同白傅和微之人閒矍鑠九旬叟海外清和四月時

其生日在四月安得牧山樓上坐寫君玉貌倩徐熙牧山樓其所居也

山居漫興

右台小住已兼旬山館清閒迴絕塵古佛分貽錫杖水

自法和寺西沿塢而上有錫杖泉老僧翦贈玉樓春法相寺僧醒機頻以牡丹花相贈

朝朝陶聖挑來笻南高峯北麓有留餘山居陶氏別墅也地多笻山僧每日來售日日

彭庵採到蕘彭雪琴尙書退省庵守者時采湖蕘相餉一事草堂難免俗宵

來鼓鑿聞比鄰

山中孤寂不能不以健兒護守

畢竟村居迥不同有時譁語起兒童亂飛樹隙黃頭雀

突入窗櫺鐵線蟲

蟲名也有六足形與枯枝無異

夜靜野狐鳴最苦

其聲

呱呱然

朝晴山鳥語徧工

鳥聲甚多不可辨

惟欣一樹薔薇好枝

北枝南白閒紅

朋舊爭來此欸扉清談有味可忘饑紅堆斐几鶯桃熟

綠滿筠籠蠶豆肥

連日飽食此二物

略具茶盤僧有例

僧舍客至皆以

盤盛餅餌佐茶

余山居亦倣之雜陳草具客休譏今朝一雨無人到山

徑苔痕屐齒稀

老夫天性本疏慵久住山中興轉濃簪料收來千个竹

山中有細竹可爲箸遠方親串爭來索取杖材削得一枝蓉屋邊芙蓉甚高
爲懶觀東嶽祠邊社時值三月廿八日鄰
下農時擬買山田數畝爲山戲唱村歌傳父老好教樵
牧和喁喁館之糧然力未能辦也

臨平雜詩

昔年曾住藕花洲今日重來理舊游猶有外家兄與姊
蕭蕭白髮總盈頭春伯表兄與余同歲伯

史翰林居片瓦無兒時蹤跡未模糊如今畫入雲萍錄

史埭春燈第一圖余童時寓居史家埭乃史翰林故居

之門下士張小雲明經圖余生平所游歷
凡四十事爲雲萍圖史埭春燈居第一

馬家陝巷一條長遺址難尋舊草堂惟贗乾河沿畔屋
泥金曾照此門牆馬家街中屋亦余舊居卽所謂印雪
軒也今燬矣惟乾河沿之屋今陳氏
居之猶無恙余中
進士時居此屋也

外家舊宅毀魂銷六十年前事未遙記得同依門檻看

斜陽人影戴家橋

外家姚氏屋亦無恙今曹氏居之其
後門臨河隔河有戴家橋每夕陽返

照則橋上往來人影悉入橋畔人家牆壁
之上頗有畫意余兒時與姚夫人共觀之

大陡門前人語譁市廛未改已全差倘教再抱書包過

何處來尋賣餅家

大陡門乃市中極鬧處余兒時抱書
赴塾親至餅家買餅今不復存矣

算有青山總似前景星觀尙傍山邊更來夕照庵中坐

細品山中一擔泉

宋時景星觀旁有東嶽廟今則并而
爲一與夕照庵均在臨平山下庵旁

有一擔泉泉小僅可容一石而干夫汲之不竭故得此名

舊游如夢認猶堪且其孫曾一夕談只惜恩恩難徧訪

午潮廟與永平庵午潮廟演劇童時屢往觀之永平庵則嘗讀書其地

去歲今年兩度過釣游舊地總情多莫教補入臨平志

恐與邱丹一例訛沈東江先生臨平志誤唐詩人邱丹為臨平人余曾辨正之余寓臨平凡

三十年釣游舊地不異故鄉後世安知不與邱員外一例訛傳乎

光緒戊子鄉試余於順天江南浙江福建河南湖

北六省闈題皆有擬作得文七篇詩四首合爲一

冊每冊賣洋錢十分之一集有成數寄上海賑局

助直隸河南之賑賦此紀之

去歲寫楹聯一揮五十幅賣得百洋錢聊以振輿獨

去年

秋冬間事黃河決鄭州海內盡輸粟我亦効區區杯水不自

慝今歲大比年多士賦鳴鹿山中一陳人豈復名場逐
見獵心忽喜弄丸手猶熟偶成文七篇如踏棘闈六東
坡擬對策直言暢所欲言我則游戲耳文心闢場屋遂令
好事者人人思寓目傳寫疲鈔胥災禍到梨木老夫忽
出奇笑謂此可鬻鬻此一千本或比楹聯速千而取百
焉值比楹聯薄漚上諸君子勇哉過賁育集貲累巨萬
災黎徧蒙福以此小助之或可供饘粥億萬飢民中一
二得果腹太倉粟一粒滄海水一掬勿笑此多矣勿厭

再三讀賣字又賣文算我硯田沃

梵書唵字歌

蔣澤山孝廉貽我梵書唵字云刻石在陝西有跋云
義靜三藏於西天取得此梵書唵字所在之處一切
鬼神見聞無不驚怖又有太宗皇帝讀曰鶴立蛇行
勢未休五天文字鬼神愁儒門弟子無人識穿耳胡
僧笑點頭不刻年月余以義靜卽義淨斷爲宋太宗
詩因賦此歌

義靜三藏取經至得此梵書一唵字其字儼然如人形
上顙下趾無不備附有太宗皇帝詩蛇行鶴立稱其奇

惜無年月供探討爲唐爲宋無人知我聞唐僧有義淨
咸亨二年初發軔遠慕法顯元奘風徧探鹿苑祇林勝
證聖元年還中朝駝來經典千牛腰閱歷二十五年久
經由三十餘國遙其時臨朝乃武后距貞觀元六十九
太宗貞觀之末年義淨五齡未髡首此字實由義淨傳
此讚非出貞觀年太宗宋帝非唐帝一言可決無疑焉
人言此字有神異野仲游光皆歛避右台仙館太荒涼
留向空山鎮魑魅

壽星眞形圖

亦藤澤山所贈

宋嘉祐八年仲冬十一月市有一異人奇古無凡骨飲

酒不計數百杯猶未歇好事圖其像流傳徧閭閻遂動
仁宗聽野服許朝謁賜之酒一石狂飲如羌羯司天忽
上奏壽星臨帝闕再訪市廛聞其人倏已滅徒令君與
臣相顧驚咄咄至今傳其圖于載幸無缺廣顙豐顙頤
秀目鬢須髮雙足森有毛草鞋而不韞人間壽星像視
此乃全別惟其身甚短不殊俗所說雖有其詭異終無
其秀發壽星見真形拜觀豈敢褻蔣子知我者謂我好
奇譎爰命其猶子摹寫窮豪末遂令楮墨閒丰采儼如
活其上有跋語託之邵康節其然豈其然斯疑未能決
事載聞見錄邵氏所采掇不言康節翁當日有此跋吾

爲作此詩不必託前哲兼擬寫萬本鐫刻同碑碣庶以
廣異聞非敢祈大耋

蔣君猶子
名在銘

書室中偶來二客蔡君芸庭年八十三王君濟川
年七十一余年六十八合成二百二十二歲戲作
小詩

三人二百二十二屈指年華我最輕戲學香山白居士
笑呼張丈與殷兄

今年夏余以孫女許嫁宗湘文觀察之子舜年字
子戴及江南鄉試榜發子戴與焉湘文觀察有詩
誌喜次韵和之

吳山越水迢遙路消息傳來榜上花

宗姓者通榜止一人亦榜花也時余

在浙中

得信已教姻婭賀

彭雪琴尚書與疾來賀

題名猶恐弟兄

差

子戴從兄弟同應鄉試者三人其名下字皆同傳者猶以為疑

深閨未向嬌孫說

廣坐先將快壻誇弱冠妙齡纔廿四老夫回首感年華

余領鄉薦時

亦年二十四

見說青年已有聲一翼旗鼓冠諸生

七年前子戴以弟一人入上元縣舉

能文久播京華譽

部門下士徐花農太史女壻許子原水部都下書來盛稱子戴年少能文蓋

皆聞之許春

繩武休虛里巷名

金陵城中有宗老爺巷見上江兩縣志乃宗氏

始遷祖通

紫陌不勞偕計吏

湘文觀察將引覲京師

綠

衣會見對延英贈詩兼為吾孫勗湛賁登科彭伉儷

嘉平十三日遣嫁孫女疊前韵誌喜

廿四年前思往事山妻一笑對黃花

孫女之將生也內子姚夫人使一姬

卜問男女姬偶持菊花一枝而返

夫人笑曰黃花乃女子之祥也

已先弱弟三年長孫余

陸雲小於止較新郎兩月差

庚子戴與孫女同婉婉聽從

嬌女態性情容止老夫誇

湘文觀察與余門下士馮夢香孝廉書問孫女性情容止

余笑曰皆好

門闌迎到乘龍壻

子戴入

何減風流鄧仲華

東漢

鄧禹年二十四封侯

傳來臘鼓正聲聲已見春從三九生此夕洞房初合登

明年金榜更題名

成禮之日余製大金字八縣樂知堂上東西兩序曰金榜題名洞房花燭

自憐門戶清於水喜見丰姿美似英爲語右台猿與鶴

一鳴再聽不須驚余今年於右台仙館聞子戴秋闈之捷明年春闈報捷余時或亦在右台也

醉司命日孫女偕壻同歸常熟口占二十八字示孫壻子戴

臨歧把袂頗難堪老淚龍鍾與壻談學得安昌侯一語愛憐孫女甚於男

至常熟謁仲雍言子墓各賦一律

熟哉遺冢未沈淪緬想高風儼可親中子不援孤竹例逸民直接采薇人翻因讓國能開國莫謂文身是辱身千古完人應第一兩全父命與天倫

仲雍墓

鬱鬱佳城枕大岡，顏曾而外見文章。
西河並世同傳教，南國千秋此破荒。
偶試弦歌偕宓子，若論豪傑過陳良。
一杯土在虞山麓，禹穴姚墟共久長。

言子墓

己丑正月聞徐蔭軒同年拜協揆之命，時漢人
三相南皮爲丁酉同年，合肥爲甲辰同年，蔭軒則
庚戌同年也。感白香山五相一漁翁之語，戲賦一
律。

五十餘年事升沈，迥不同。朝中三宰相，湖上一漁翁。
曳履星辰上，挈舟煙水中。香山詩句在，聊可贈羣公。
送許氏第二外孫及四五兩外孫女赴滇。

萬里滇南路難堪此別離汝曹歸有日吾老見無期少

小游偏壯崎嶇到恐遲日邊與泉下何以慰相思時次女亡

久矣壻在京師外孫輩隨其伯父赴雲南祿豐縣任

送彭雪琴親家還湖南

二十年來交誼舊三千里外別愁新回思歷歷夢中事

相對依依病裏身

君病未愈余亦大發宿疴

人羨還鄉衣有錦我憐

攬鏡鬢如銀惟期同保桑榆景猶欠花前酒幾巡

舊有百杯

之約至今未竟

書城隍歌

宋鄭祭四塘事載於左氏杜訓墉爲城是卽城隍始成

都城隍廟建自李贊皇乃稽崇廟貌初不由於唐蕪湖
舊有廟赤烏二年建可知三國時祀已徧郡縣凡物之
所聚其中必有精聚久精氣厚是以有神明中霤與井
竈名殊理則一既凝而爲精斯孕而成質吾家環堵室
積書固已多積至數萬卷高連棟與阿其上巍然隆其
中竊然曲雄關天府秦危棧劒門蜀古人擁書坐謂可
抵百城如我書室內不媿書城名有城則有神有神則
宜祀書城隍之名吾竊以義起清晨一瓣香敬爲書城
隍願神守書城勿爲鼠蠹傷人謂禮無徵我謂神如在
除夕祭長恩請以城隍配

城隍之祀當以左傳所載宋
鄭祭四壙爲始或謂卽八蜡

水庸然水壩乃田
閒水道非城隍也

四月二十二日爲內子姚夫人忌日距其亡也正
十年矣漫賦一律

年年此日一吁嗟自隔幽明十載賒孫不成名吾已老
貧仍如故病稍加竟登耄耋誠無味欲抱曾元未有芽
細事報君聊發噉小浮梅檻又堪划

曲園中小浮梅
壞又修治之

六月三日爲內子姚夫人生日計其生年七十歲
矣又賦一律

白頭偕老付空談欲遣前情總未堪一別十年年七十
又逢六月初三我生亦似燈將燼世味真如蠟不甘

明歲嘉平初度日可能同坐右台龕

烏目山人王朝忠所書細字歌

其字凡五十有四刻象牙爲胡麻形兩面書之文曰
詩云樂只君子民之父母民之所好好之民之所惡
惡之此之謂民之父母庚午十一月書於印月山房
之西烏目山人王朝忠年七十有一以顯微鏡照之
行款整齊筆畫清晰洵奇作也孫壻宗子戴孝廉以
示余因爲賦此朝忠字蘊香吳縣人寓居常熟有護
花廊詩草庚午爲同治九年

昔聞覃溪翁先生歲歲朝有故事每於西瓜子上書

萬壽無疆四楷字五十歲後目力衰天子萬年字稍易六十歲後力更衰改書天下太平四又於一粒胡麻上手把麤豪恣遊戲一片冰心在玉壺七字分明工且細其後富陽董文恭能寫胡麻亦其次天下太平字不難難於寬綽有餘勢古來絕技誰能同惟師宜官有此異曾聞寸紙寫千言究竟不知真與僞異哉王君伊何人有此奇能是宜識刻象牙作胡麻形與真胡麻形無二執筆爲書大學篇當日不知焉取義詩云樂只至父母二十九字密如蠶字分兩面各數行其下年月無不備烏目山人王朝忠書於某年與某地其地印月山房西

其年庚午今猶記是歲七十有一齡古稀老翁見者悸
異哉王君伊何人豈非熙朝一人瑞我於何所得見
之出以示者吾孫壻老夫自愧目力孱借光於鏡始能
覘豈惟字跡不模糊更覺筆端饒嫵媚眾手把玩懼銷
磨一家聚觀同愕眙此技從來不多見願爾珍藏勿輕
棄眉娘尺絹七卷經以此視之亦何愧倘逢老輩董與
翁吾知欣然定把臂

九月之季自杭還蘇久雨之後大水瀾漫舟中率
書所見

雨晦風瀟兩月連推蓬四望意茫然長川浩浩都無岸

野水滔滔亂入田童子操舟過橋上老翁浙米坐階前
臨流不少參天樹今日看來僅及肩

今年湖州各縣皆荒於水而吾邑德清爲甚聞之
盡然因念去歲曾以擬墨一千四百本賣得洋錢
一百四十圓助直隸山東之賑余今歲亦有擬墨
之作乃援舊例印一千本每本賣洋錢一角集成
百數寄上海施君少欽彙付德清賑局以効杯水
之助賦詩紀之

故鄉昨日有書傳話到窮閭實可憐老我空存周急意
貧儒惟仗賣文錢叨分阿堵青銅百

時洋錢一角
廣印
止值錢百

麻沙白版干去歲發棠今又請車薪杯水總寥寥

余賣文助賑以擬墨百本寄龔仰遽觀察每本售
洋錢一角乃承以十倍之直相讎賦此謝之

集腋成裘未覺勞戲憑筆墨換錐刀書來忽拜百朋賜
文價俄增十倍高君以千縑謝皇甫我將一粥助黔敖
他年龔遂傳中看此事雖微亦足豪

詠東瀛二物

懷鑪

以洋鐵爲之形如片瓦空其中以炭屑裹紙熱之可置懷袖間故名懷鑪

金錕熏香未足珍東瀛佳製得來新老夫冷盡心頭火
懷抱猶存方寸春

齒磨

形如粉色微頰用以擦牙可去齒垢故以磨名

刮垢摩光用最奇瓠犀能使白如脂老夫零落殘牙少
留贈人閒利齒兒

余賣文助賑已以洋錢二百寄上海矣又念今歲
以賑冊屬代募者甚多余杜門養拙之人不能爲
沿門托益之事因一并寄還施君少欽而膜以賣
文續得之洋錢二十賦詩志愧且謝不能

呼癸呼庚大可矜自慙吾力竟難勝須知中散閉關客
不是阿難托益僧惟有癡符聊可畫敢求諸價再從增
一齊寄付施元長愧此茆茆兩十朋

孫女自常熟寄詩來次韵和之

冬來晴旭滿窗寮
日日清晨坐到宵
庭竹無風猶自夏
瓶花不凍尙須澆
病魔未共三尸斬
詩壘猶堪一戰挑
知爾紅閨將詠雪
尖叉險韵鬪蘇潮

韓如海柳如泉歐如淵蘇如潮乃李

耆卿語今人輒云韓朔蘇海誤也

德清蔡家橋有章菊泉者以種痘爲業年八十餘矣
今秋因久雨成災禱天求霽無效乃縊而死其愚不可及也賦詩哀之

天降秋霖不可止
有翁庭中跪不起
叩頭禱天求天晴
一雨四旬猶未已
額角流血膝爲穿
皇天高高不我視

翁力竭矣無能爲中夜一繩維經死嗚呼此翁何其奇
爲民請命身殉之其人能爲小兒醫其家亦具中人貲
有子有孫不孤獨八十九將期頤愚不可及乃至此
天高聽卑胡不知雷霆曾爲匹婦下山岳曾爲愚公移
至今晴檐長杲杲或者天亦憐其癡是可歿而祀於社
蔡橋土穀翁宜尸豈惟下伍大官廟兼當上配戴侯祠
異時村巫走報賽絃管嘔啞歌我詞大官廟戴侯祠皆
吾邑土神戴侯名
繼元宋延祐中以拯溺而水死成神封保濟顯佑侯大
官廟在新市鎮大官橋側大官者失其姓名其人開米
肆歲大無賤糶以予貧民米
盡抱升斗赴水死亦成神

花農典試山西歸途於平定州青玉峽得白石一

琢爲文具二自京師寄贈爲賦此詩

白石固晉產見於詩唐風鄰鄰與鑿鑿不與他山同我
疑太行雪終古難消融千載化爲石湍水相磨礪遂令
谿澗內吐氣成白虹徐子使三晉驛路馳花驄驚見青
玉峽苗此白芙蓉采之質磊砢叩之聲玲瓏琢爲文具
二貽我曲園翁近朱與近墨隨其所遭逢一爲印泥盆
要其本來質皓然無汙隆是有君子德竊以勵我躬老
夫年七十不慕喬與松但求返太素堅白完初終

沂水劉次方給諫

綸襄

今年分校禮闈得余孫

陸

雲

卷謂其用筆迴不猶人奇賞之乃薦而未售甚

以爲惜賦兩絕句由花農寄示因次其韵寄花農
并呈給諫

阿孫稚小未成名虛費先生太息聲想在青雲深處看
誤將籬鷓當焦明

五星聚處夜沉沉遙望龍門俯萬尋但願舊栽花更好
不教姑負養花心

再疊寮字韵兩首寄孫女

知汝裁箋傍畫寮寄從昨日到今宵膚寒或藉懷鑑熨

前數日寄去東洋懷鑑二氣順無煩肺露澆聞嗽疾已愈肺露治杯

酒香甜常酩酊書來言每匣琴生澀嬾句挑料應妝罷

趨庭日歸棹剛乘黃浦潮

計其君舅湘文觀察當從滬上歸矣

日映簾櫳月映寮憐余寂寞度昕宵鬢毛久被嚴霜壓

肝木難憑聖水澆

時余發肝疾

世事懶撐雙睫看俗緣擬卸

一肩挑門前尙有求書者苦遣分書學李潮

日有求書者且約必

作八分書甚厭之

十二月十七日次曾孫女珉寶生日適有餽鹿筋

者煮以啖之戲賦一詩

今日汝生朝明歲汝年六啖汝以鹿筋願汝壽如鹿